



kat.komp

59700



Mag. St. Dr.

P

Archiepiscopi. Seb. Joannis: Gratia crucis et virginis
proles R. Joannes à Cruce —

Febr. 5752.

Biblioteka Jagiellońska



stdr0001634

GRATIA.
CRVCIS ET VIRGINIS PROLES.

B. JOANNES

A CRVCE.

SACRI ORDINIS PP. CARMELITARVM DISCALCEATORVM.

PRIMVS RELIGIOSVS.

SERAPHICÆ MATRIS AC VIRGINIS.

S. TERESIÆ A JESV.

COADIUTOR FIDELISSIMVS.

In primo Beatificationis suæ Triumpho,

ORATIONE PANEGYRICA

Ad Ecclesiam sui Ordinis, Conuentus Posnaniensis,

DEMONSTRATIVS.

Per

Nobilis ingenij puerus.

M. SEBASTIANVM IOANNEM LESCZYNSKI. Philosophiæ in Alma Vniuersitate Cracouiens: Doctorem & in Collegio Lubransciano Posnaniens: Eloquentiæ Professore.

Anno Patentis Gratiarum Portæ. M. DC. LXXV. Die 20 Octobris



IN ARMA ANTIQVISSIMÆ
CARMELITANÆ FAMILIÆ.



59700

Candida stellatos dum pandit GRATIA postes,
Flammeus Eliæ quid peto mucro velit?
Excubat inclamans: procul ô procul este prophanii
Delicias carpet GRATIA sola meas.

FÆCVNDÆ VIRGINI,
ILLIBATÆ MATRI.

Ignis Eliani æstuario,
Amoris Seraphici Vesuio.

DIVÆ TERESIÆ
A JESV.

DISCALCEATI CARMELI ORDINEM,

Sponso DEO,

Pronubâ DEIPARA,

Magno militantis ECCLESIAE bono,
feliciter enixæ.

INVICTÆ HEROIDI.

Ascetici Recessus,

Fundamento, Basi, Columnæ.

SANCTITATIS FASTIGIO.

Laboris sui primitias,


PRIMOGENITO EIVS SACRAS,

Cliens Minimus

D. D. D.



Vsa e suis latebris, in publicum euolare, tenuis mea lucubratio
non melius conquieuerit, quàm ad Tuos pedes. DIVA MATER.
Fluctuanti nempe, & per terrenas undas quarenti, ubi requie-
sceret pes eius; præiuit Columba Tua, pacificæ ramum Oliuæ pratendens:
nec alibi mansuram securius indicans, quàm in Eliano Paradiso: maligno-
rum sagittis imperuio, popularibus undis inaccessso. Fastidiret forsitan elino-
guem hanc, & balbutientem Suidam, immodicè iam comptus seculi genius:
ad Te igitur confugit, cui infantiles etiam naniæ, vacillantibus syllabis pro-
latas, audire volupe est: Mater cum sis. Condiēt asperitatem sermonis,
verborum scabritiem emolliet, gratum Superis, iucundum Tibi, GRATIÆ
à CRUCE nomen: ambrosiam spirans & nectar. Quodsi par Primogenito
Tuo Encomiastes non assurgit; Tuâ id factum causâ: quæ dum Eum adhuc vi-
uentem, Seraphico stylo, SANCTVM proclamasses; effecisti, ut tam
Augustam Panegyrim, sola Ecclesia posset imitari. Tantis Oraculis quid-
quid, in terris accinit; levis quædam, & euanida Echo est: reddens verba
nouissima, & ea quidem non sua. In tam sacra dicendi materie, temeritas
etiam non improspæra est. Icarium iter tentans, casum non metuit: quia non
infra, sed supra se, Mare habet MARIANVM: in quod prolabi, quan-
tæ felicitatis esset! Si non improbas, humillimi cultoris conatum; nã ille vi-
cit Zoilorum dentes. non improbas autem sat scio. Calitum enim natura est,
& clientibus suis exigere, non quantum debent; sed quantum possunt.





* * * * *

ORATIO.



æleste Virginitatis germen, fructum arboris Vitæ salutiferum, præcinente Summo in terris Oraculo, applaudente Orbe, qui in Urbem sui compendium, ad hauriendos uberes Anni Gratiæ proventus, confluit; læto suscipimus cultu. A A. Fæcunda rursus, non inusitato jam, post Virginem Matrem ostento Virginitas: nedum in fragili hæc & luteâ mortalitatis domo, filiorum lætatur aspectu; sed novellas etiam olivarum, in circuitu mensæ Domini, gaudet collocatas. Arbor scientiæ boni & mali, in qua impatibilis DEUS, extrema quæq; tolerare didicit, ut nos optima speraremus; maturum cælo, terris salubrè fructum protulit: hoc enim ex ipsa vi nominis sonat, JOANNES, id est GRATIA à CRUCE. Latuerat hæc aliquandiu, nec confestim orbi tantum bonum, Eliani custos Paradisi Cherub patefecit; donec solutis Portæ Sanctæ repagulis, (per quam, quidquid in cælo gratiarum exitit, in orbem plenis alveis defluxit) hæc quoq; nobis pateret, quibus sacratissima illa divitiarum cælestium adyta, spectare & ingredi non licuit. Debebatur hoc felicitati Tuæ, Clementissime Orbis Præses, CLEMENS X. cujus fastos, crebrâ Divorum Apotheosi insignitos, rarâ inconcessâq; pluribus felicitate, uterq; orbis, non sine admiratione venerabitur: sub cujus faustissimorum Syderum constellatione, novus eum gratiarum cataclysmus inundavit: & cunctis montibus sublimior, altissimum Carmeli Verticem, purissimis lymphis operuit: dumq; Magni Tui fluminis impetus lætificat Civitatem Dei, de ejus plenitudine, tot in nos bona, tot favores promānarunt. Sublimia Vocis Tuæ Oracula, inter tot publicæ venerationi exposita nomina, mundo nec ignota, nec tacenda; delicias spirant in ROSA, Apostolicum robur in PETRO Alcantara, Victorias in LVDOVICO Beltrando, libertatem in FRANCISCO Borgia, stabilitatem gloriæ in STANISLAO Kostka, pacem in SALOMEA, gratias in JOANNE. Ut jam mirum non sit, tam gratioso ex ipso Nomine Principi, in quo sacer ille denarius, exactissimam perfectionum omnium conclusit pyramidem, Portam Gratiarum celsisse referendam. Sed me tantorum nominum fulgor, nedum Orationis agonem ingressum, repente perstrinxit: quibus venerandis profundum sat erit silentium: ne dum tot collectos soles, debili pupillâ, impar sanè Argi æmulator, contracto audentiùs; illicò Tiresias deprehendar. Fatigabitis insignes calamos, ô lucidissimæ ævi nostri gemmæ! sub Vestris elogiis ingentia pulpita, illustres exedrae desudabunt. non deerunt decora ingenia: quæ collectam in se lucem Vestram,

veluti ad tersissimum speculum reflexam, non quidem illustriorem efficient; sed magis spectabilem. celebrabitur vel eo solum nomine, seculum satis felix: quod cum tot provincias, Byfantino Phalaridi, in foedam servitutem cecidisse ingemuerit; mundano Imperio coarctato, caeleste dilatavit: dum nimirum Princeps futuri seculi, sub finem temporum, novum sibi suisque in regione pacis regnum stabiliens; novas è terris deducit Colonias: in quibus purpuratas nascentis, & mundo denascentis Ecclesiae legiones, gratà varietate distinguant, liliati Proceres. Narrabitur inquam serà posteritati praesens seculum: inter tot detrimenta opulentissimum, inter lacrymas latissimum, inter bella pacatissimum, inter infortunia fortunatissimum. nec inconcinnè subolebit cuipiam, ad tantorum solennium illustres ferias, ipsa è terris in Empyreum gaudia commigrasse: ideoque non facile aliis communicari, quàm quibus infixæ cælo, immersa DEO mens est. Dum verò novum hoc in altaribus exortum Sydus, Seraphicæ Matris TERESSIÆ fidelissimum Coadjutorem, alterumque Excalceati Carmeli Parentem, D. JOANNEM à CRUCE, mihi publico venerandum cultu conspicio; nec initium, nec exitum Orationis reperio. Ipsum nempe tam augusti nominis vocabulum, gratis deliciisque vernans; omnem Tulliani fluminis dulcorem exhaustire capax est: meritorum ac sanctitatis gloria, uberrimam dicendi venam potest absumere. Difertissimus alioqui Cyneas, Romani Senatûs amplitudinem conspiciens, sensit eo splendore, Orationis suæ lumina eclipsari. quidni & ego deficiam: dum in hoc sanctitatis & innocentiae Templo, Heroicarum Virtutum Arcopagum: non jam intempestâ nocte; sed luce illustrissimâ consedissee video. Inopem & mendicam facundiæ vim, ac minimis quibusque imparem, ipsa materiæ sublimitas, nedum terret; sed prosternit: nî Vestra A: O: erigat benevolentia, & tam gratiosæ Nominis benignitas. quæ despondenti animum eloquio aurem vellicat: neque satis pro dignitate unquam, Divorum elogia, mortali ore depromi: neque sine piaculo præteriri: & nunquam sine præmio esse, licet imparem; felicem tamen hoc nomine temeritatem: quod cum Divis non prosit; prosit sibi. Dabis igitur Veniam Magne JOANNES, si amplitudinis Tuæ capacitatem, exili conceptûs mei decempedâ, metiri præsumam: amplioribus alibi Te celebrari præconiis non ignoro; at nuspiam satis Tuis: eadem mihi cum cæteris nota erit, nec magnitudini Tuæ, nec Voluntati meæ satisfecisse. Ignoscetis & Vos devotissimi Auditores; si ad tantam lucem, dictionis meæ acies palpitaverit: ac in immenso gratiarum pelago fluctanti, benevoli affectûs auram adspirabitis.

Vellem ego curiosæ neutiquam novitatis affectator, consueta Oratorum terere vestigia: quibus sublimes illustrium Virorum Panegyres, ab antiquissimis majorum insignibus ordiri, solenne est: receptâ, imò in immensum productâ superflitione, numerosam paginarum molem, effictis etiam & fabulosis; ac ex obscuro antiquitatis fumo, in lucem protractis imaginibus infarcire, labore (ut ego quidem opinor) sæpè irritò: quippè si personam, dignam suorum laude atavorum deprædicet; tantum ipsi adimit, quantum illis adauget: si degenerem nanciscatur; laudis specie impropere, & insultat. Naturæ crepundia sunt hæc, qui-

bus illa

bus illa à teneris illectos mortales, dum hæc sola tantummodò admirari, & adorare docet; veram Virtutis pulcritudinem, si non despectam, certè non ita optandam efficit: multis vanâ opinione persuasis; nobilitatis decora non esse acquirenda, cum vernacula domi sint. Inopis certè, ne dicam avari est, ad augendum domesticum splendorem, priscorum Heroum sepulcra compilare: & in speciosos elogiorum suorum titulos, detracta sarcophagis Epitaphia, puerili sanè furto adaptare. In Orchestra mortalitatis, multò avidius ea spectantur: quæ vivis distincta coloribus, gratâ varietate oculos everberant; quàm quæ obscuris expressa umbris, indiscretâ superficie, fallunt visum, non alunt; fatigant, non satiant. non equidem omnino rejicienda, sed subsecundariis adhibenda scenis; quas nimirum ad vivum exhiberi, possibile non est. Neq; ego majorum lucem, Divo JOANNI defuisse concesserim. Sæpenumero soles hi, in paupertatis eclipticâ; non quidem amittunt splendorem, sed abscondunt. Habet suum fortuna cursum, quo ad instar primi mobilis, rationales sphæras, nunc in augem honorum, divitiarum, Majestatis attollit: nunc infra perigæum deprimit; securâ ramen semper Virtute, & sub terris etiam radiante. Obscuro natum loco, Divum JOANNEM dicere, piaculum est; dum in Hispania natum dicimus: quæ omnes infidelitatis tenebras, non odit tantum; sed accensis facibus, lynceis planè oculis scrutatur, flammis abolendas: ipsas nimirum hoc saltem modo, cogens splendescere. Regio hæc amica lucis, cum solis occasum nesciat; inter tot lumina, quæ Orthodoxæ Ecclesiæ fecit exoriri, duorum Principum CAROLI, V. & PHILIPPI II seculo; ingentes illas primæ Magnitudinis Stellas, IGNATIUM LOJOLAM, LUDOVICUM BELTRANDUM, FRANCISCUM XAVERIUM, FRANCISCUM BORGIAM, TERESIAM à JESU, JOANNI nostro coævas, in ejus Firmamentum intulit: ut dum Potentissimi Reges, arma victricia, per novos Orbes extenderent; Ecclesiæ quoq; Monarchia, Alcidae limites egressa; ignotas & defletas ALEXANDRO Macedoni Provincias, novo bellatorum aucta numero, computaret. Vix cunis egressus, è blando parentum sinu, in placidum DEIPARÆ Virginis gremium transfertur: præcipiente matris curam, Matre misericordiarum: quæ gerulæ functa officio, vera scilicet Nòèmi, magnæ Principem Familiæ, suum dici & esse voluit. Deciderat gemino casu, in profundam aquarum voraginem, tenellus adhuc JOANNES: & ecce dum omni destitutus ope ima petit; non deest pulchræ dilectionis Mater, unaq; Virgineus Sponsus: submersum erigunt, gravitatem sustentant, desperatum luci Parentibusq; reddunt. Agnosco nova, in novo Moyse prodigia: nempe & hic in cænofo ac turbido fluitans Nilo, Regiæ Viraginis manu tollitur; olim in filium, stabiliiori profectò fortunâ adoptandus. Non evasisti undas sanctissime pusio, sed mutasti: ex turbida lacuna, in Mare magnum ac spatiosum translatus. Felix certè casus, qui te in tantam felicitatem detrusit: felix orbitas, quæ Patris immaturâ morte pupillum, cæli pupillam fecit: deditq; sub illis vivere Parentibus, sub quorum magisterio, humanatum VERBUM, patientiæ tyrocinium exegit. Mitte jam omnem de filio curam

ô Mater! humanis erudire artibus ne cogita; quem arcanorum suorum interpretem fidelissimum, Divinitas sibi seposuit. Liber vitæ intus & foris, cruento charactere exaratus, Divini humaniq; Juris, illi monstrat rubricas. Schola illi Nosocomium, Magistra Charitas. In hac nempe miseriarum ac patientiæ Universitate, cælestis Theologia discitur: cujus objectum DEUS, si uspiam alibi, maximè in egenis ac debilibus, sese præsentissimum exhibet: nedum demonstrabilem, verum planè palpabilem. Hinc illa inaccessa, Mysticorum Tractatum sublimitas emerfit: hinc sacra Epithalamia, Seraphicis decantata modulis: hinc insatiabilis patiendi orexis, nullis calamitatum ac despectuum explenda lautitiis: hinc animus abstractus terris, cælo inhærens, nihil scire cupiens, nisi CHRISTUM, & hunc Crucifixum.

Hactenus infirmum spectasti DEUM, Dive Adolescens: gloriosum videre vis? montem ascendas necesse est: hîc ille Divinitatis radios, amoto sipario exhibet: hîc sole augustiorem vultum, hîc candidissimas vestium nives, spectandas præbet: hîc cum ELIA moras nectens, te futurum Religionis suæ Moysen præstolatur. Attollite portas & Vos MARIANI Principes (meritò enim Vos hoc titulo insigniero, tantæ Reginæ filios) in monte Vestro, qui totus sanctus est, sanctitatis ponat fundamenta: aspero obscuroq; pænitentiae cilicio, lacteum Angelicæ puritatis candorem circumponat: cujus ista flos est pulcherrimus. Cælestis hîc animus, humiq; reptare nescius, elevet corpusculum quantum valet, Deoq; propius admoveat, in Vertice Carmeli.

Ad sacri hujus montis admissus recessum, non dico immutatus; sed planè alter factus est JOANNES: ita tamen, ut illi renascentis Solis elogium, non insulso cujuspiam commento adaptatum, magnopere serviat: Alius & idem. Messalam Corvinum, Ciceronis ætate & eloquentiâ supparem; casu quodam proprii nominis oblitum, tradidit antiquitas. Eadem Divo nostro, licet ex alio fonte obliviam. Mundo ereptus, nedum omnium ejus ineptiarum; sed cognominis quoq; proprii excidit memoriâ: familiæ Patrisq; nomen, vix ad radicem Carmeli, potuit eum comitari: nam fastus, ambitio, habendi cupiditas, & alia seculi inquinamenta; ne in seculo quidem illi adhæsere: Matthiæ Apostoli nomen & omen sumpsit: cujus felici sorte, ad Apostolicam sublimitatem, ipsamq; CRUCEM, humilitate esset perventurus. Hæc est deliciarum tuarum vis, Mons sanctissime: in cujus vertice constitutis, diutina cum Moyse fames, convivium est: Ubi non in sonoro Elementorum fremitu, non in igne devorante, non in commotione; sed in tenuis auræ sibilo Dominus: ut pote qui author pacis, amator silentii est. Vitam hanc solitariam quis credat? quæ cum ipso Conditore familiariter conversatur; in quo sunt omnia. otiosam dicere nefas est; quæ æternitatis Architecta, gementem sub luto, paleâ, & latere, mundum despiciens; nunquam minùs otiosa est, quàm cum otiosa: nec uspiam minùs sola, quàm ubi sola. Hoc in recessu, desponsa DEO mens, Amorem suum, inter fragrantissima Thomistica speculationis lilia; in montibus aromatum, Dionysianæ ac Gregorianæ contemplationis; ubi cubaret in meridie, sollicitè vestigans; tandem in sacris Altaribus invenit.:

& ut retineret amantiùs; internum cordis cubiculum, abstinentiâ evacuatum, pœnitentiæ scopis mundatum, charitatis aulæis exornatum, sincero puritatis odore, tanquam fragrantissimâ nardo perfudit. Ibi dilectum cordis sui repertum, strictis tenuit amplexibus; & ne unquam posset avolare, firmissimis catenis alligavit. Verè Aurei Velleris Eques, Agnum immaculatum gestans pectore: non aureâ quidem; sed ferreâ torque decorus: metallumq; fortius, splendidiori præferens; accinxit fortitudine lumbos suos, & in carnis innocuæ pœnas, ne spiritui unquam rebellaret; armatum flagellis, roboravit brachium suum.

Jam ex arcano seculorum rationali, suæ stationis tesseram accepit, felix tempus; quo antiquus Carmeli decor, in primævam rursus repuerascens infantiam; primos vagitus, sub facundæ Virginis TERESSIÆ uberibus, caput ordiri: attonito ad eam novitatem Orbe, concinente faustum Genethliacon Ecclesiâ. Quanta hîc prodigiorum farrago! Inops Virgo, & adversitatum solummodò, adversariorumq; dives, tot Asceteria construit! Delicatus Eden hortus, detumescentibus diluvii aquis, pulcrior emergit, vernantiorq;: non arcente Angelo, cujus gladium flammantem, Divæ Instauratricis, sive humilitas excussit, sive lacryma extinxit. Primus in ejus possessionem, reali pedum positione, reintroducitur sexus; qui prior ejici meruerat. Quid amplius deest Tibi Diva Mater? Hominem inquit non habeo; qui deliciarum hoc dives penu, operando custodiat. Confide Virgo, jacta in Dominum curam Tuam; ex cujus adyto, faustum tibi sonat Oraculum: **Tantisper expecta filia, & res magnas videbis.** Stoam hanc Virtutum, nunc orphanam, Magnus sanè Magister, licet parvus corpore, Tuus Seneca primus illustrabit: nec solum frequentem; sed insignem efficiet. Et planè si magnum in minimo, spectare unquam licuit; hæc profectò prima renascentis Carmeli cunabula, stuporem omnium vincunt. Non domus, non tugurium; sed ergastulum quoddam, aut carcer potius destinatur: imò Divæ Matris vocabulo, stabulum verè Bethleemiticum, ubi nobiles feræ, ad Domini sui præsepe, jugi virtutum pabulo nutriantur. Bono este animo illustres animæ: utut non ex atomis, ex modicis certè principiis coaluit, quidquid illustre ac magnum conspicitur. Exigui fontes, in latissima excrescunt flumina. bina ternaq; folia mutilato immissa stipiti, sublime brevi cacumen attollunt in æthera. Ex paucissimis mapalibus, Orbis capaces Urbes; ex ignobilibus viculis, nobilissimæ Republicæ coaluere. Divinum ignis elementum, tantò clariùs tonat, tantò violentiùs erumpit, splendidioraq; emicat in fulgetra; quantò fortius coarctatur. Erit, erit illud profectò tempus! quo diffusa per Orientis Occidentisq; plagas Lumina; angustum illud limen, augustum celebrari facient. Adorabit Arcæus Orbis, venerabuntur Antarctici Antipodes, & quidquid gentium avara sui hucusq; barbaries abscondit; faustum hunc sui luminis fontem, doctrinæ Peripaton, salutis tesseram. Exercitati hâc in Palæstra bellatores, victricia per ignotos populos arma circumferent: Elianoq; gladio, Domini Exercituum honorem zelantes, impuri Baal, mystas impurissimos trucidabunt. Agnoscat barbara Persis, sentiet diyes America, tot Heroum sacram melioris metalli famem: quorum industriâ,

oblimatum erroribus, obscuratum tempore; imò in puteum Democriti demersum veritatis aurum, THOMÆ olim Apostoli, felici chymiâ confectum; in sui solis lucem extraheant, & proprio cruore perpolieant. Venient annis secula feris, quando præeuntibus ac internuntiis, restaurati Carmeli Syderibus, post depulsas errorum tenebras, odoriferæ Arabiæ, eoq; nomine verè felicitis, Magnæ Armeniæ, Syriæq;, insulati Vertices, Vestrorum pedum Vestigia INNOCENTI X. & ALEXANDER VII. adorantes, bonæ fidei thymiama Vobis Ecclesiæq; adolebunt. Sed quò vadis anime? Vix Duruelensis Eremiti angustias deseruisti, & ecce orbem, quâ immensus patet peragrasti! Adeò volubile & præceps est quidquid designatum sui cursûs metam excessit! siste gradum! non deest quod hîc ingens admireris. Asperum hunc & inutilem antea rubum, præsentissimum Numen postquàm accendit; & ecce alteri Moyysi arcana Vox, intimas mentis aures everberat: Solve calceamenta de pedibus tuis: locus enim in quo stas, terra sancta est. Paret is jubenti DEO, & in illa solitudine montem reperit; ubi primus & solus Discalceatæ familiæ leges, tabulis cordis sui, Divino insculptas pollice; sollicitus ruminat: & exemplar futurus patientiæ, ut CHRISTO Cruci configatur, CRUCIS stemmate & nomine insignitur. Faustum, mecastor, magnitudinis tuæ augurium, Dive JOANNES! Certè sublimis ille cælorum Theologus, cum à corde CHRISTI, unde fluenta Evangelii hauserat, magnus rediisset; major sanctiorq; rediit à CRUCE: illîc præco, hîc frater Domini effectus: eâdem Parente VIRGINE, obstetrice CRUCE. Euge ne dubita, Te Magnæ MATRI teneriori affectu uniendum; quæ sub eâdem arbore, cum universum fidelis propaginis germen; tum Te specialiùs, Tuumq; Ordinem: tunc Benoni suum, nunc Benjamin amantissimum, ingenti cum dolore parturivit. Non est mei instituti, imò nec facultatis, sacri illius recessûs arcana, altissimo silentio demersa, è latebris Religionis eruere: nempè Pharisaicam ostentationem odisse, Patrem luminum clauso exorare cubiculo, Heroicæ perfectionis opera, in abscondito facere, à quotidiano mortificationum exercitio, quosvis testes, imò ipsum solem excludere; Carmelitani fervoris & virtutis hæreditarium est. Familiaria hæc Divo JOANNI fuere commoda: terra culcitra: lapis, cervical: quies, contemplatio: cibus necessitati vix; palato nunquam serviens: quivè mortem, potiùs arceret, quàm famem satiarer. illa verò specialiora patientiæ bellaria: fames, cibus: nives, operimentum: imbres, tegumentum: somnus infomnium. Tali tyrocinio ad instantia sese certamina disponebat animosus Pancratistes, quæ multa imminebant, à jurato Antagonista: qui sive blandiens, sive sæviens æquè nocivus est; imò cum blanditur, multò nocentior. Et hoc quidem telum, versipellis vulpes, expedire volupe habuit: quo non aliud blandiùs ferit, perimitq; suaviùs. Libenter hæc tacerem Auditores. ne aurium oblectamenta, insitâ multis vanitate, videar congerere; nî piaculum putarem, illustrem triumphum reticere; quem multi (fateor) consecuti sunt; at tantâ fortitudine, anto fructu, profectò nemo. Stygius Angelicæ puritatis osor, castissimum illud æcri pectoris castellum expugnaturiens; facies admovet, ministrâ furiâ: quam, ut neliùs lateret, adureretq; fortius, specioso falsæ pietatis pallio contextit exterius,

& occultis interiùs flammis armavit. Intempesta nox, solitudo, preces, blanditiæ, extremæ impudentiæ mista desperatio, cuncta sibi pollicebantur. Quid Tibi tunc consilii, JOANNES castissime? Adfuisset saltem, salutaris illa Divi Aquinatis tæda! hâc face Stygium ignem restingueres: hâc infensas lumini cordis Tui tenebras, dissipares. In linguam ergò Tuam sævies? Ut innocentissimi NICETÆ verè victoriosum secutus exemplum, in faciem tentatricis expuas: & invecundæ mulieri, saltem cruoris Tui murice, ruborem offundas? Ah ne feceris! etiam linguam præcidisse, vinci fuisset! quantum hosti accresceret virium, sublatâ Divinissimi ardoris officinâ! Triumpharet tenebrarum, tenebrionumq; Princeps, seq; tanto impendio victum, gratularetur! Quæres igitur cum FRANCISCO nives, aut sentes cum BENEDICTO: malignam hanc, quia Stygiam febrim, aut refrigeratione; aut sanguinis minutione curaturus? Nihil his opus est. & si opus sit, in lingua sunt omnia. Si flammis exurenda est, hæc scelerum seges; ignitum eloquium Tuum vehementer: loquere tantum, & anima peccatricis, in pænitiæ fluenta liquefiet. Si morte nefas multandum est; Mors & Vita in Manibus linguæ. Ita factum Auditores. Igneis linguis D. JOANNES, tartareum ignem extinxit: & quia sibi nihil; peccatrici multum metuebat; Thaumaturgum illud Divinissimi Pnevmatism instrumentum, tantâ eloquentiâ expedit; ut effrons suæ alienæq; pudicitiae lena, incestu furores, casto deinceps amore commutârît. Novum hercle & inauditum Victoriæ genus! Cecidit, cecidit Tyrannus ille, quo nemo infensior mortalibus, nemo in vincendo felicior! Vicere illum quidem plurimi, Parthorum more pugnantes: nonnulli eminens aggressi superârunt: solus D. JOANNES cominus manum conferens, eum sic etiam vinci posse docuit. Decerpe triumphales laurus, ex amantissimo Carmeli tui Vertice, sacra Religio! Date candida manibus plenis lilia, æternitatis candidati! en Alcides Vester detracta hosti spolia, perenne fortitudinis suæ trophæum, in Capitolio Divinitatis appendit! Accinentibus illi Empyreis Quiritibus, Vos quoq; nobiles Collegæ

Dicite Jö Pæan, & Jö, bis dicite Pæan!

Triumphus hic, victoriarum non meta fuit, sed gradus. Alios vicisse parum videbatur; nisi seipsum vicisset. Martius ille ac invictus animus; deficientibus, quia prostratis hostibus, sibimet ipse hostis, & vincendi materies; odisse animam suam sapit: quid dico caput? imò non destitit: occasiones patiendi, perinde ac si ultro in hâc mortalitatis catasta non occurrant, nedum quæsit; sed anxii etiam votis expetiit; & quod in pænam noxarum, propè nimium esset, in præmium laborum poposcit. Familiarem sibi sæpenumero, imò semper expertus DEUM, dum intensius efficaci prece fatigat; sibi colloquentem audit: ab eoq; petendi quod vellet; præciso repulsæ metu, accipit optionem. Quid interea censetis Auditores? (liceat mihi paulisper ancipites animos, brevi deliberatione suspendere) quid inquam censetis? (uti ridicula, terris immerfarum mentium vota præteream; quæ inepta semper: ut plurimum nociva sunt) quid tandem petiit? Ipsum scilicet cum Divo AQUINATE bonorum fontem? non. Sublime in regno lu-

minum ad utrumq; Regis latus, cum gemina illa Tonitruum prole, solium? non. Beatissimum cum Moyse peraugusta faciei conspectum? non. Desideratam periculosa militiæ, cum veterano Simeone missionem? non etiam. Dissolvi & esse cum CHRISTO, quod oculatus caelestium spectator unice suspirabat? non deniq; hoc ipsum. Quid igitur? DOMINE pati (inquit) & contemni pro Te. Euge Athleta fortissime! dabitur quod petis, ne dubita. Optimum eligendi modum secutus es. Non negata sunt cæteris sua desideria, sed dilata: tibi adeo sacrum votum, negare DEUS non potuit; differre, inhumanum duxit. Præcinge lumbos Tuos, gladio accingere: grandis enim Tibi ærumnarum via conficienda restat; donec ad montem DEI perveneris. inexplata hæc patiendi esuries, utcunq; sit; saturabitur tamen opprobriis, ærumnarum bellariis saginabitur. Et quidem non temerè dubitaverim A. A. injuriæ dici possint; quas ipse Divus JOANNES, quæsit ut toleraret? Merito inclusum carceri licet innocentem, ausim dicere: quem cum posset subterfugere; noluit. Inauditum Martyrii genus! quod & sufferens extra culpam fuit, & inferens non omnino culpandus. Aenigmata loquor: liceat enim plerosq; id latere, quod perspicax illud D. TERESSIÆ cor, abstrusissima quæq; vel in Empyreo scrutari solitum, adeo pertinaciter latuit. Ne inquire Discalceati Proceres, quo abiit dilectus Vester? descendit in hortum nunc, ubi comminutâ corporis testâ, desideriorum suorum fructibus vescatur. Igneus Seraph, in centro patientiæ, unitur igni suo: ad quem pertingere dum nequit; eum ad se attrahit. Angusto ergastulo ne supponite inclusum: Ubi tam vasto Giganti, associata moratur Immensitas. Sive cælum in carcerem, sive carcer in cælum transit. Liberiori auræ sibiq; redditus, quocunq; perrexit; patiendi sitim, & occasiones secum circumferebat: nec prius tolerare destitit, quàm vivere. Vidisti sacer Ordo, cum in toto vitæ decursu, tum in extremâ illâ ægritudine, infractum animum: qualem suo Herculi, falsa & fallens, inter suprema discrimina, vetustas affinxit. Decumbebat redivivus Job, recusum in officina doloris, ipsissimum patientiæ simulacrum: externis cruciatibus, interni angores cumulabantur, credidisses conjuratas in illum, uno impetu calamitates irruisse. Tot malis, non alium murum D. JOANNES opposuit; quàm se ipsum. Alium pati crederes, incidi, curari: adeo vultu extitit, nedum constanti; sed etiam alacri. Non minor in explorandis ulceribus, quàm in sanandis, requirebatur medentis industria. Obfirmatus & (si fas est dicere) obstinatus, ad tolerandum animus; tormenta illa, delicias putabat: nec aliter in illis perstitit, ac si rofas calcaret, & inter florum agmina decumberet. Necdum patientiæ meta est. Herculeum Non Plus Ultra, ingentibus factis transcendere, seculi hujus iterata felicitas. Inconcussa munitione corporis, internam cordis arcem, occultis cuniculis, vesanus livor arietat. Apage cruenta bellua! abscede infelicissimum monstrum! nihil agis, nihil proficis, tuis te machinis pessundas, tuo te gladio jugulas: dum etiam nolentem, cogis ad victoriam. Plagæ tuæ, sagittæ parvulorum factæ sunt: ad primum istius turris contactum, irritæ resilient. Carbones desolatorii, quos ad denigrandum candorem, è Stygiis titionibus adaptasti; amoris igne succensi, suave illius virtutum thymiana liquantes, gratissimo superos odore perfuderunt. Funeste, tuoq; tantum

exitio

exitio felix livor, profuisti nocendo. qui dum de Sancti excessibus Processum formas; innumeros reperisti; sed charitatis: auxisti que excessum patientiæ, de quo novus ELIAS cum transfigurato in se CHRISTO, in monte dolorum colloquebatur. Inquisitio illa (si affectus abfuisset) sola promovendæ Apotheosi sufficeret, suffecitq;: ea enim hoc tempore, in amplissima Triumphantis Ecclesiæ Purpuratorum Congregatione, sedulò agitata, brevi conclusa est: inter tot clara sanctitatis indicia, minus habitura momenti; si de laudabili instituto, hic etiam Fidei Promotor, argumenta in contrarium, quæ potuit opponens, abfuisset.

Immania vada & obstantes scopulos eluctata Oratio mea, patens pelagus ingreditur, & licet immensum sit; velis, remisq; summas carpens undas, brevi delabetur in portum. Aderit comes ubiq; , imò prudentissimus Naclerus D. JOANNES. qui appenso ad malum Crucis, intimæ Contemplationis velo; placidissimâ Divini Pnevmatismis aurâ, pleno: nunc pacificum immotæ Fidei, inconcussæq; fiduciæ mare legit: nunc ad firmum, bonæ Spei promontorium, stabilem jacet anchoram: nunc ad fortunatas Charitatis insulas, excelsam puppim alligat, haud ampliùs alto committendam. Ac cælestium quidem contemplatio Princeps esto. Hanc in priscis illis Asceteriis spectatam, seculorumq; injuriâ planè mortuam, Divus JOANNES, in suo sodalicio; post Seraphicam Matrem TERESSIAM, primus suscitavit. Adeò parùm illi fuit, inter innumera prodigia, mortuos ad vitam reduxisse; nisi ipsam vitam Contemplativam, vitæ; hoc est, sibi reddidisset. Paradoxa hæc, minus habent ingenii quàm veritatis: nempe meliùs spectantur, quàm narrantur. Præluxit in hoc sequacibus suis, cælestis ille animus, terrasq; ne puncto quidem contingens: nempe Sphæra hæc, mundo simpliciter excentrica; circa proprium centrum, continuò volui debuit. Et mirabimur illi tantopere odiosam fuisse, carneam hanc molem: quæ nobilissimum spiritum, impar sanè, tanto hospiti, importunusq; Paterfamilias, detinuit? Inclusus cauâ nube ignis ardentissimus, dum tentaret erumpere; quid mirum, si horrendum intonuerit, suumq; domicilium lacerârit? Linquebat sæpenumero sedem suam, quâ poterat, planèq; ibi non erat, ubi erat; dum illuc cupit evadere, unde erat. Spiraculum vitæ, in faciem hominis, communi quidem; sed tamen nobiliori modo inspiratum, ad suum anhelans principium: dum corporis carcere detinetur; ipsum non semel, cum suis fulcris, in sublime tollebat. Ergonè putabimus, aut fidem ipsi defuisse; qui nimirum non tam crederet, quod non videret; sed videret, quod crederet? aut fiduciam non adfuisse: qui nedum curam suam supra Dominum, sed se totum, quantumquantus fuit, abjecit? Egestatem ille metueret; qui Regum Regem, in quo omnes thesauri sunt, habebat ex asse suum? Num deessent necessaria DEO militantibus? Majori nomine obligatum sibi Numen, certò confidens; in maximis inconcussus, in minimis non vacillabat. Jam verò amoris ardentissimi, succensas in eo flammæ, vivas semper, & per singula momenta majores, quænam Ætna exprimeret? quis demonstraret Vesuvius? Non mihi si centum linguæ, centum adsint ora, vel ipsum enarrare Procemium fas esset: adeò sublimi stylo Amor perorat! cujus Inventio ex Locis non Communibus terreni ingenii; sed Propriis petitur:

non Dialecticis sive argumentis, sive argutiis; sed ex cælesti Theologia erutis desumitur: Dispositio non partibus; sed Toto constat, quod DEUS est: Elocutio non oris; sed cordis est. Quæcunq; hâc Arte, Divinus iste Vir, vel scribendo, paginis; vel loquendo, mentibus impreffit: cuncta Amorem spirât & flammæ. Ut non immeritò ELIAM igneum, credamus rediisse. Revolvite Mysticos ejus Tractatus: non aliud judicabitis, quàm flammæ seminarium. sive arduum Carmeli ascensum, fallente laborem cantu levigat: sive periculosum Noctis obscuræ iter, charitatis face collustrat: sive Flammam Amoris vivam, faustus mundo Phaëton spargit: sive Canticum spirituale, Salomonico spiritu; sed Angelicâ puritate, extra se raptus occinit. Et quandoquidem Amor ignis est; latere minimè potest. prodit ille se, erumpitq; disjectis obstaculis; aut in se conversis. Unde illi toties visi circa Sanctum splendor: Undenam insolitâ luce suggestus radians: in splendoribus quippe Sanctorum habitans, quid aliud promeret nisi fulgores: Unde illa tam lenis, tam benigna in omnes comitas; quæ totum aliis impendebat, quod negabat sibi: Nempè bonum, adeò sui communicativum est; ut nedum sua, sed seipsum libenter impertiat. Ita sanè qui seipsum, aliis serviendo consumpsit, in tantum sibi eviluit; ut honorem contumeliæ, contumeliam honoris minimè acciperet. Summus illi gradus despici, summum tormentum laudari. Præesse compulsus, primum submisionis specimen dedit; quod promptè paruisset. Nonnisi ex vestitu vilissimo, & continuo pietatis exercitio Prælatum agnovisses. Ad labores & ærumnas, non tam jussu & hortatu; quam exemplo, subditos sibi manuducens: semper se priorem exhibuit: quod est verè Priorem esse. Collatam sibi festis Quiritum acclamationibus Provinciam, contrario planè aliis exemplo; etiam compilatâ Patriâ cælesti, thesaurisq; illius, pio sacrilegio, ex sacrationi templo ereptis, magnificè exornavit. Sensere Magnum potestate, licet corpore exiguum revixisse BASILIUM, desertores spiritus. Possellas hæcenus urbes animatas, quarum aut exterius corporis pomærium; aut intimam mentis arcem, belli jure, tot annos obtinuerunt; vel imperio, vel armis coacti dedere; ad concolores sibi Nigritas, inglorii ringentesq; redierunt. Extorta dolo malo chirographa, inviti reddidèrè pessimi negotiatores: judicante JOANNE, contractum non valere, quem minorennis, & Sponsa, inscio Marito iniisset: & læsus ultra dimidium venditor esset. Reveriti sunt corporum carnifices morbi, medicum animarum: cui multò facilius erat externos languores, quàm interna, eaq; periculosa mentis symptomata curare. Undas aut ex nube, ignibus; aut ex fluvio, seipsis armatas, non extimuit: ejus enim structura, non in arena; sed in solida fidei rupe, stabilita; omnes aquarum elationes, à puero formidare dedidit.

Sed me aquarum & pueritiæ mentio, illius infantie admonuit; quâ renati cælo, ad ubera Creatoris festinant, felices filii: exhibente funebri velo fascias; & feretro, cunas imitante. Ea nempe filiorum DEI, verè natalis dies est; quæ ex angusto ac tenebroso mortalitatis utero, magnas mentes, in lucem effundit immortalem. Nascere cælo magne Infans; nascere! sat maturus es, cui ultra Naturæ præscriptum, decem non menses; sed lustra effluxerunt! En jam intra medium silen-

tium,

tium, adest auspicata nox, Tuâ luce velut dies illustranda. Adest desiderata duodecima; quæ diurni laboris Tui, à primo exortu, ad extremam usq; facem fidelissimè continuati, exoptatam quietem, & amplum accelerat stipendium. Undecimâ licet horâ mundi, ad opus Tuum veneris; ne dubita, primis Te coæquandum, adeò sedulum vinitorem! Sabbativus Magnæ VIRGINIS dies, tot ærumnis fesso, tot laboribus fracto, tot doloribus exhausto, verè quietus, verè sabbativus extitit. Rectè sanè antelucana volucris, mellita lusciniâ, quæ tot modulis obscurâ nocte continuatis, cælites oblectâsti; nocturnas laudes cantatura, evolas in cælum! Moyse mitissime, post consignatas meliori populo leges gratiæ, in montis Calvarii vertice, (ad radicem nimirum Crucis) expiras, in osculo Domini! Effundis hilitum vitæ, in cruentas Plastræ Tui plantas: ut purissima innocentiae columba, in foraminibus petraë conquiescas! O! felicem animum, qui ne prolixo æternitatis itinere, à dilecti sui præsentia, vel minimum abesset; primum è corporis januâ, ad ejus pedes gradum faciens; tot passuum myriadas, hoc compendio confecit! Lucis beatissimæ novus hospes, splendoris sui radios, nedum in corpus; sed in sepulcrum etiam derivare potuit. In montem thuris, ex monte myrrhæ translatus, admirandam omnibus impressit fragrantiam, quæcunq; illi adhæsere. Distractæ dehinc ac planè discerptæ, paupertatis gazæ. magni muneris loco donata Magnatibus patientiæ supellex, armamentaria pietatis: repetentibus ab intestato bona illis, qui eum sanctum esse testabantur. Litigatum magnis Urbium contentionibus, de exanimi corpusculo: & quidem sub CLEMENTE VIII, ut jam constaret; augusta hæc Clementiæ Nomina, Gratiæ amica esse. Nec immeritò quidem, de illo corpore certatum; cujus minima quoq; portio, Æsculapii Galeniq; pharmacis nobilior, saluberrima morborum amuleta, mortis antidota, præstaret necessitati; Parrhasii Apellisq; officinam, piæ curiositati. Arrexit ad hanc, nullo visam seculo scenam, perspicaces oculos, attonitus orbis: spectavere tot oculati testes, Ideas illas cælo conceptas; non Platonica, & vana figmenta, ex sapientum commercio, jam pridem explosa; sed nova Divinitatis prodigia: quæ dum oculos exterius pascunt, mentem miro cælestium desiderio succendunt. Habeat sibi suas lutulenta Ægyptus literas; tot obeliscis ac pyramidibus insculptas, tot sapientum voluminibus explanatas: quibus sacrarum vocabulum injuriosè attribuit! alias jam Carmelus invenit, verè sacras, planèq; Hieroglyphicas: in quibus scilicet, non Crocodili aut baculi; sed suâ specie, DEUS designatur. Etiamnum illud nobilissimi spiritûs receptaculum, in præcipuam quandoq; triumphantis Ecclesiæ gemmam assumendum; è medio corruptionis cinere, admiranda exhibet Phænomena; futuræ beatitatis pignora, in terris præcipiens: cumq; videre DEUM necdum queat; facit videri. Occultaverat Sanctus pertinaci silentio, exhibitam sibi toties Numinis præsentiam: sed linguarum vices, subiêre humiliata; imò veneranda ossa; quæ toties Domino suo exultârunt: ut scilicet prædecessoris sui ELISEI exemplo, mortua prophetarent: quæq; dum viverent, ut cremium aruerant; post obitum, de sepulcro pullularent.

Ruit jam, cum labente in præceps die, tanto rerum pondere depressa, Oratio mea: suumq; horizontem delerens, rubet in occasu; quòd contumaci dicacitate, Sancti laudes attrectare præsumpserit: quem nemo laudavit melius, quàm qui exactius imitatus est. Tuæ id datum felicitati, Carmeli Excalceati Ordo Amplissime; magis vitæ sanctimoniâ, quàm dicendi ubertate, Parentis Tui encomia celebrare: qui cælorum genuinus stylus; ac proinde sublimis est. Fruere Antesignani Tui triumpho, cætus candidissime! Præcipe trophæorum Tuorum gloriam, quibus sub extremum agonem Orbis, niveo isto nitore in purpuram verso, (tot præcinentibus Oraculis) inclaresces. Portam Gratiarum, CLEMENTIS X. referatam Clementiâ, primus ex Tuis intravit D. JOANNES; sed minimè solus: quem tot brevi magna Instituti Tui decora, consequentur: tanti Parentis, simillima sanctitate proles. Triumphis aggerentur triumphi: laurea succrescent laureis: nec unquam gladius Tuus, pro DEO Exercituum, pugnare cessabit; donec cælum novum, suis syderibus plenè exornatum, mundo finem dederit, & initium æternitati. Triumphas jam, aeternumq; triumphabis, fulgentissimâ Fratrum cinctus coronâ, Magne JOANNES. Debitos Tibi honores, gratulabunda ubiq; majori fortasse apparatu, reliqua Christianitatis Regna persolverunt: non tamen his cedit Polonia; quam ô velis dici & esse Tuam! Amica hæc est CRUCI Tuæ; dum ejus trophæa, contra sævam Orientis procellam explicat: & bacchante; in mutuasq; cædes, proh dolor! forti, Christiano orbe; sola, (magno licet finium & salutis impendio,) tuetur. Adepto laboranti gratiosissime Tutelar! Porridge fatiscenti Ecclesiæ muro, benignam opem; jam ante, Serenissimo JOANNI CASIMIRO, (ipsius testimonio) exploratam. Agnoscat violata Religio, Te zelatorem CRUCIS, cujus fulgentia Trophæa, nuper ex præcellis sacrarum ædium fastigiis, Odrysiæ lunæ, immani ausu deturbârunt! Augustiores Tibi præreptos plausus, Eliano igne vindica: quos inter Sarmaticas Urbes, Podoliæ quoq; Metropolis, in Tui olim Ordinis basilicâ, nunc infami heu! Machometanæ impietatis lustris; non minori pompâ Tibi persolvere gestiebat. Impetra auxiliares è cælo copias JOANNI III: vindicatæ Religionis gloriam, tot Victoriis auspicatam, in solidum deberi effice, cognomini Regi! Ultor hic injuriæ Tuæ, ultor fractæ fidei, ultor offensi NUMINIS, pro CRUCE & cum CRUCE pugnans, Te Duce, Te auspice, existat, IN HOC SIGNO VICTOR.

D I X I.

A. M. D. G.

LESNÆ,

Imprimebat MICHAEL BUK. Anno M. DC. LXXV.



XX. 1. 25

